

IRRATIAK. Orogen buru, Miarritzeko ituna erdietsi nahi dute



BOB EDME
Hernan Gure Irratiko lehendakaria, Andruccioli CNRLeko lehendakaria eta Morel Topeteten koordinatzailea.

‘Irratiak, kulturak eta herri hizkuntzak’ nazioarteko irrati topaketak abian dira

Esperientziak trukatzea eta hizkuntza eta kultura aniztasuna bermatzea da xedea

Aitor Renteria | **MIARRITZE**

Europako Hizkuntzen Urtearen kariatara, CNRL (irrati libreen konfederazioa) eta Gure Irratiak antolatu dituzte *Irratiak, kulturak eta herri hizkuntzak* izeneko topaketak Miarritzen, Europako Kontseiluaren eta Europako Batzordearen sostenguekin. Italiako, Frantziako, Espainiako, Euskal Herriko eta Belgikako 150 kidek hartuko dute parte Miarritzeko topaketetan.

Olivier Morel topaketetako koordinatzaileak irrati libreen hizkuntza gutxituen eta kulturaren sostenguan eta hedapenean izan duten garrantzia azpimarratu zuen atzo: «1981ean, irrati libreen araudia egin zelarik, hizkuntza bakarra baitzegoen airean, frantsesa».

«Hamabost hizkuntzaren erabilpena, 30 minutuko 32 eman-kizun, euskara, italiara eta frantsesezko webgunea, 320 irratiaren mobilizazioa: horiek dira topaketa hauetako emaitzetarik batzuk», azpimarratu zuen Gilbert Andruccioli CNRLeko lehendakariak.

Egitaraua

Ostegun arratsaldean abiatuko dira topaketak, *Europa eta Hiz-*

kuntzak gaiarekin. Fode Sylla, Koldo Gorostiaga eta Helene Flautre eurodiputatuek parte hartuko dute mahai-inguruan. Eztabaidaren ondotik Gure Irratiaren egoitza bisitatuko dute.

Egun guztiz gai baten inguruan egingen dira gosariak. Ostiralean, *Euskal Irratien esperientzia* izanen da mintzagai. Ondoren, *Hedabideak eta hizkuntza aniztasuna* izanen dute hizpide, eta ondotik CNRLen baitan bil-tzen diren 230 irratiaren artean itun bat plantatzen hasiko dira; horretarako, aipagai izanen dituzte irratiaren eginkizunak, agintekiko jokamoldeak, hizkuntza eta kultura gutxituen aldeko lana bultzatzeko tresnak eraikitzea... Arratsaldean, berriz, Durangoko azoka bisitatuko dute.

Larunbateko gosarirako gaia *Hedabideak eta euskara* izanen da, eta ondoren Gure Irratiaren webgunea aurkeztuko dute.

Igandean, Ipar Euskal Herriko Garapen eskema aipatuko da gosarian, eta ondoren hizkuntzen ituna izenpetzeko xedea daukate. «Miarritzeko Ituna dei daitekeen honetan, hizkuntz politika argi bat hartu beharko genuke, aginte publikoei hizkuntzen defentsa eska-

tuz», adierazi zuen Agus Hernan Gure Irratiko lehendakariak, «hizkuntza unibertsala delako, euskara ez da Gure Irratiarena edo euskaldunena bakarrik, mundu osoarena baizik, eta giza eragile guztiek defendatu behar dute, denon altxorra delako».

«Urtero hogeita bost hizkuntza hiltzen dira munduan, eta Gura Irratiak hogeita urte betetzen dituen honetan epe horretan 500 hizkuntza desagertu direla jakiteak zer pentsa eragiten du», gaineratu zuen.

HEDABIDEAK.

‘Aitzina Xiberoa’ aldizkariak Herri Elkartek bultzatutako lanen berri ematea du xede

Allande Sokarros | **MAULE**

Zuberoako etxe eta bizitegi guztietan banatu da egunotan *Aitzina Xiberoa* izeneko aldizkaria. Zuberoako Herri Elkartea da kazeta horren argitaratzaile, eta duela bi urte eratu zen hautetsi egitura horren lanaren berri ematen du, tamaina handiko 8 orritan. *Txorta* deitutako gehigarriak, berriz, argibideak ematen ditu Uhaiatzandia ibaiaren eta honi lotzen diren erreken bazterreko herriek izenpetutako Erreka Hitzarmena operazioaz.

Aitzina Xiberoa barruan aztertutako gaiak dira, hurrenez hurren, Herri Elkartek ekonomia berrantolatzeko bultzatutako plana, lantoki sorgunea, hala baserri guneetan zerbitzuen

mantentzeko edo garatzeko politika, nola etxebizitzaren hobetzeko edo eraberritzeko ekitaldia.

Zaborren bilketaz gai berezia

Erdiko orrietan zehatz-mehatz azaldua da, aldiz, 2002. urtean Zuberoan indarrean jarriko den zaborren bilketa berezia, eta horrekin ahalezkoa izango den birziklatze egitasmoa. Hondakinen bereizteaz argibide zehatzak emateaz gain, dossier horrek azaltzen die herritarrei zaborren birziklatzeak dakartzan ondorio abantailatsuak. Postaz 5.000 ale banatu dituzte, eta *Aitzina Xiberoa*-ren azken orrian, berriz, Zuberoako 35 udalerriko ordezkarien izenak ageri dira. Eduki gehiena frantsesez idatzia da.



CHRISTOPHE DE PRADA

Battitta Keheille Herri Elkarteko burua, *Aitzina Xiberoa* eskuetan.

**TAKOLO JURRIK
ETA PORROTX en**

**DISKO ETA
IKUSKIZUN BERRIAK
PREST !!**

OSTIRALA 14 - GETXO

19:00etan Areetako Geltokiko Plazan

LARUNBATA 15 - EIBAR

16:30ean eta 18:30ean
Unibertsitate Laboralean

IGANDEA 16 - USURBIL

16:30ean eta 18:30ean Kiroldegian

ASTEARTEA 18 - MIARRITZE

10:00etan eta 14:00etan Jai-Alai Frontoian



PARRANDA BIDEA ERE KALEAN DA DAGOENAKO !!